

喉癌與吸煙・有口難言

W3C: 第一個場景係唐先生使用電子咪做自我介紹。然後佢攤起白色布做嘅保護罩遮住佢頸下嘅人工造口，並將保護罩嘅繩係頸後打結，之後用手整理衣領。

唐先生: 我姓唐，今年六十四歲。

W3C: 唐先生使用電子咪開始講嘢。

唐先生: 我 2014 年 11 月，發現有呢個喉癌三期。

W3C: 螢幕右方出現「香港平均每年有 191 喉癌個案」。

唐先生: 到過咗半年之後，又再翻發。到咗 2015 年 10 月份，要做一個割除全喉嘅手術，同埋割埋個聲帶。

W3C: 唐先生無奈地向窗外凝望，鏡頭拍向唐先生的左手放喺窗邊揪住支電子咪，螢幕上方出現「香港每年平均有 63 位喉癌患者死亡」。

鏡頭背景為唐先生望向窗外，螢幕中間出現「喉癌與吸煙的關係」。

唐先生: 我去睇醫生，醫生就話俾我聽，話我哋點解有呢一個喉癌。佢話多數都係食煙引起嘅。

W3C: 螢幕左上方出現「長期每日一包煙，患喉癌機會增加十二倍」。

唐先生: 我食第一口煙嘅時候，大概是十七歲。正式我食咗煙仔都有 40 年喇。

W3C: 唐先生無奈地望住鏡頭右下方。

唐先生: 當初啲朋友遞俾我呢我就食㗎啦，演變到後期呢就愈食愈多。

W3C: 鏡頭影住唐先生幫佢支電子咪換電。

唐先生: 我呢 10 幾年都係揸緊的士，得閒又食，冇客又食，差唔多日日食成兩包煙。

W3C: 螢幕正中間出現「怎樣發現有喉癌？」。

唐先生: 最初呢我點樣發現呢個喉癌呢，就是我成日覺得個喉嚨有嘢頂住，成日睇醫生，又唔退燒。

W3C: 鏡頭影住唐先生將頸下便嘅造口保護罩拆開，露出頸下嘅造口，然後佢攤紙巾擦乾淨造口。之後再將造口保護罩綁好。

唐先生: 我就覺得好無奈，失去咗工作能力啦，社交活動啦，運動嘅能力啦。切咗個全喉手術，影響到我個聲帶講唔到嘢。如果我而家唔用個電咪講嘢呢，就好似咁樣喇。

W3C: 唐先生放低電子咪嘗試講嘢，但係發唔出聲音。螢幕右上方出現「喉部切除後，患者無法自然說話，需要依靠設備發聲」鏡頭繼續影住唐先生嘗試講嘢但仍然冇聲音。
螢幕中間出現「手術後的生活」，背景係唐先生正在飲水。

唐先生: 我做完呢個手術之後，我嘅味覺同嗅覺都得返百分之二十左右。

W3C: 螢幕右上方出現「喉部切除後，三成患者完全失去嗅覺」。

唐先生: 我哋食嘢呢，要慢慢食，唔食得快，食得快呢好易噏到。我哋做咗個造口呢，啲痰會比普通人多咗好多嘅。

W3C: 螢幕右上方出現「有氣管造口的患者，需要長期使用化痰藥及放濕器來治理濃痰」。

唐先生: 所以呢我哋而家仲要食啲化痰藥。

W3C: 鏡頭影住唐先生望向窗外，然後鏡頭影住海邊一隻小船。然後螢幕中間出現「手術後，你最懷念什麼？」。然後鏡頭影住唐先生喺海邊散步。

唐先生: 我以前游水呢，鍾意游蛙式嘅，游嘅姿勢就係咁喇。

W3C: 唐先生一邊講一邊兩隻手做蛙式姿勢。然後鏡頭影住唐先生望向大海嘅背面。

唐先生: 因為我哋做咗全喉手術，喺呢度開咗一個造口，變咗要靠呢一度呼吸，一落水就入水㗎喇，一入水就有得救㗎喇。

W3C: 螢幕左上方出現「有氣管造口的患者，需慎防有水份流入造口」。

唐先生: 我曾經去過海下果個沙灘，我自己落去，心口高嘅水。

W3C: 鏡頭影住唐先生響沙灘散步。

唐先生: 但係好多朋友同埋啲會友都話咁樣好危險，佢話如果一跌咗落去呢，咁就有㗎喇。如果我無呢個病呢，我第一時間就衝落水果度游餐飽㗎喇。

W3C: 螢幕右方出現「何時戒煙？」。

唐先生: 我初初發現咗有喉癌三期嘅時候，嗰個月呢我已經戒咗煙㗎喇。其實戒煙都唔係咁難嘅啫。

W3C: 鏡頭影住唐先生望住大海上面嘅大貨輪，然後轉為影住佢手上面嘅電子咪，然後再轉為影住唐先生坐喺海灘嘅上邊望海。

唐先生: 你盡量少見啲食煙嘅朋友，戒煙就盡量唔好見到啲煙仔。戒咗煙之後呢，個身體呢都好咗，個人就爽啲啦，胃口又好啲啦，樣樣都覺得比以前 fit 咗啦。同埋而家好多地方都唔食得煙，咁你食嚟做乜嘢，噍氣！.

W3C: 螢幕中間出現「有沒有後悔吸煙？」，背景係唐先生望住大海，有兩隻小船飄浮。

唐先生: 有呢個病呢都有辦法㗎啦，雖然好後悔當初食煙。

.

W3C: 鏡頭影住唐先生喺海灘散步。

唐先生: 如果有機會，返到 17 歲嘅時候，我都建議我自己唔好食煙，因為真係太多影響，影響到我而家乜都做唔到。總之一句講晒，無奈。

W3C: 鏡頭影住唐先生喺樹下邊望向遠處，然後再影唐先生身後面海中心嘅一舊石。

最後螢幕中間出現「戒煙事 不宜遲 1833 183」，再轉為「特別鳴謝唐耀添先生、陳秋鳳女士、香港新聲會同人」同埋香港新聲會標誌。宣傳片結束。